

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 शनिवार

दिनांक 21.09.2024

प्रमुख समाचार –

- 1– बस्तर क्षेत्र म माओवादी हिंसा ले पीड़ित लोगन मन नई दिल्ली म राष्ट्रपति ले करीन भेंट ।
- 2– राज्य सरकार ह लोहारीडीह घटना के बाद कबीरधाम जिला के कलेक्टर अउ पुलिस अधीक्षक ल हटाइन ।
- 3– जगदलपुर के कलेक्टोरेट परिसर म पोस्ट आफिस पासपोर्ट सेवा केंद्र के होइस सुरूआत – बस्तर सांसद ह करीन उद्घाटन ।

समाचार विस्तार ले

राष्ट्रपति–मुलाकात

छत्तीसगढ़ के बस्तर क्षेत्र म माओवादी हिंसा ले पीड़ित लोगन मन आज नई दिल्ली म राष्ट्रपति द्रौपदी मुर्मू ले भेंट करीन। राष्ट्रपति सोसल मीडिया पोस्ट म किहीन कि कोनो भी लक्ष्य ल हासिल करे बर हिंसा के रद्दा म चलना ठीक नइ हे। हिंसा कोनो भी समाज बर महंगा पड़थे। राष्ट्रपति ह

वामपंथी उग्रवादी मन ले हिंसा छोड़े के विनती करीन। ओमन किहीन कि सरकार ह उंखर समस्या के हल बर हर संभव परयास करही।

राष्ट्रपति ले भेंट म पीड़ित मन बतइन कि कइसे माओवादी हमला ह ओमन के जीवन ल खराब करे हे। प्रतिनिधि मंडल ह राष्ट्रपति ल बतइन कि पाछू चालीस बछर ले बस्तरवासी मन माओवादी हिंसा के दंस ल झेलत हे। एमा हजारो लोगन मारे गेहे अउ सैकड़ो मन निसक्त हो चुके हे।

केंद्र सरकार—सौ दिन

केंद्र के नरेंद्र मोदी सरकार ह अपन तीसरइया कार्यकाल के सौ दिन पूरा कर लेहे। एमा केंद्र सरकार ह मध्यम वर्ग, किसनहा, माईलोगिन अउ युवा मन उपर धियान देत हुए पंद्रह लाख करोड़ रुपिया के आने—आने परियोजना सुरू करीन।

सरकार ह मध्यम वर्ग ल राहत अउ ससक्तिकरण बर कई ठन काम करे हे। सात लाख तक के आय उपर कोनो टेक्स नइ देना पड़े, जेखर ले करोड़ो करदाता मन ल फायदा होय हे। मोदी सरकार ह तेइस लाख केंद्रीय कर्मचारी मन ल यूनिफाइड पेंसन स्कीम म पचास परतिसत पेंसन देहे के आस्वासन देहे। सेवा निवृत्त रक्षाकर्मी अउ उंखर परिवार बर वन रैंक वन पेंसन ल अउ जादा लाभकारी बनाय गेहे। प्रधानमंत्री सहरी आवास योजना

म दू लाख करोड़ रुपिया ले जादा के लागत ले एक करोड़ घर बनाय जाही ।

कवर्धा—कलेक्टर/एसपी

राज्य सरकार ह लोहारीडीह घटना के बाद कबीरधाम जिला के कलेक्टर जन्मेजय महोबे अउ पुलिस अधीक्षक डाक्टर अभिषेक पल्लव ल हटा देहे । श्री महोबे के जघा म गोपाल वर्मा ल कबीरधाम जिला के नवा जिलाधीश बनाय गेहे । उन्हें, डाक्टर पल्लव के जघा म राजेश कुमार अग्रवाल ह कबीरधाम के पुलिस अधीक्षक के पद संभालही । श्री महोबे ल नागरिक आपूर्ति निगम म प्रबंध संचालक अउ डाक्टर पल्लव ल पुलिस मुख्यालय म एआईजी के पद म पदस्थ करे गेहे ।

उहें, बलरामपुर—रामानुजगंज जिला के पुलिस अधीक्षक पद म बैंकर वैभव रमनलाल ल नियुक्त करे गेहे । लोहारीडीह घटना के मामला म रेंगाखार थाना के निरीक्षक, सहायक उपनिरीक्षक समेत उंहा के सबो तेइस पुलिस कर्मी मन ल हटा दे गेहे, फेर कबीरधाम जिला के अतिरिक्त पुलिस अधीक्षक आईपीएस विकास कुमार ल पहिली ही निलंबित करे जा चुके हे ।

इही बीच, मुख्यमंत्री विष्णुदेव साय ह लोहारीडीह घटना के मजिस्ट्रियल जांच के निरदेस देहे । अतिरिक्त जिला दण्डाधिकारी निर्भय कुमार साहू ल एखर बर जांच अधिकारी बनाय गेहे, अउ उंहला तीस दिन के भीतरी जांच

करके रिपोर्ट देबर बोले गेहे। मुख्यमंत्री ह किहीन कि अइसन कोनो भी घटना म लापरवाही बर्दास नइ करे जाही अउ जिम्मेदार मन उपर कड़ा कार्रवाई होही।

उपमुख्यमंत्री—कवर्धा आरोपी मुलाकात

उपमुख्यमंत्री अउ गृहमंत्री विजय शर्मा ह आज केंद्रीय जेल दुरुग पहुंच के उंहा कवर्धा के लोहारीडीह घटना म जेल म बंद माईलोगिन मन ले भेंट करके उंखर बात सुनिन अउ मामला के निष्पक्ष जांच के आस्वासन घलो दीन।

जेल के निरीक्षण करे के बाद श्री शर्मा ह पत्रकार मनले गोठबात करत हुए किहीन कि एक गंभीर मामला हवय अउ एखर मजिस्ट्रियल जांच होही। ए मामला म दोषी लोगन के खिलाफ कार्रवाई करे जाही अउ निरदोष मनखे मन ल छोड़े जाही।

कांग्रेस—छत्तीसगढ़ बंद

प्रदेस म कानून—व्यवस्था के स्थिति अउ कवर्धा म कथित पुलिस हिरासत म होय एक झन युवक के मउत के विरोध म आज कांग्रेस कोति ले बलाय गे छत्तीसगढ़ बंद के मिंझरा असर देखे बर मिलीस। कवर्धा म अधिकतर दुकान बंद रिहीस। उहें, राजधानी रईपुर समेत प्रदेस के आने

सहर मन म बंद के असर कम रिहीस अउ कई ठिन जघा म बाजार खुल्ला रिहीस।

कांग्रेस के प्रदेस अध्यक्ष दीपक बैज अउ आने नेता मन मोटर साइकिल म रईपुर के आने—आने रद्दा म घूम के व्यापारी मनले बंद के समर्थन करे के अपील करीन। श्री बैज ह राज्य सरकार उपर आरोप लगइन कि प्रदेस म कानून व्यवस्था के स्थिति बिगड़ते जात हे अउ हत्या, अनाचार, डकैती जइसन आपराधिक घटना सरलग बाढ़त हे, जेला रोके म राज्य सरकार ह विफल हे।

राज्यपाल—दीक्षांत समारोह

राज्यपाल रमेन डेका ह आज रईपुर के श्री रावतपुरा सरकार विश्वविद्यालय के तीसरइया दीक्षांत समारोह म सामिल होइन। ए मउका म राज्यपाल ह एक हजार चार सौ चालीस विद्यार्थी मन ल डिग्री—डिप्लोमा अउ आने—आने बिसय म पहलइया नंबर पाय बीस ले जादा विद्यार्थी मन ल स्वर्ण पदक प्रदान करीन। उन्हें, लोक गायक पद्मश्री प्रहलाद सिंह तिपानिया अउ कवि सुरेन्द्र दुबे ल डी.लिट. के उपाधि दीन।

कारीकरम म गोठियात हुए राज्यपाल ह किहीन कि नवाचार, अनुसंधान अउ विकास ले हमन समाज म सुधर परिवर्तन ला सकथन अउ गरीबी, बीमारी, अउ बेरोजगारी समेत कतकोन ठन समस्या के समाधान कर

सकथन। राज्यपाल ह पढ़इया मन ले किहीन कि समय के सदुपयोग करंव
अउ अपन सपना ल पूरा करे बर कड़ा मेहनत करव।

पासपोर्ट सेवा केन्द्र

बस्तर लोकसभा क्षेत्र के सांसद महेश कश्यप ह आज जगदलपुर के कलेक्टोरेट परिसर म पोस्ट आफिस पासपोर्ट सेवा केंद्र के उद्घाटन करीन। ए मउका म श्री कश्यप ह किहीन कि देस के आजादी के अठहत्तर बछर बाद पासपोर्ट कार्यालय ह बस्तर के लोगन बर नवा उपहार हे। अब बस्तर के लोगन मन के बहुते पुराना मांग पूरा होय हे अउ ओमन ल पासपोर्ट बनवाय बर राजधानी अउ आने सहर उपर निर्भर नइ रहना पड़ही। ओमन नवा पासपोर्ट कार्यालय बर प्रधानमंत्री नरेंद्र मोदी के आभार जतइन।

राष्ट्रीय लोक अदालत

आपसी समझौता ले मामला के निपटारा करे बर राष्ट्रीय विधिक सेवा प्राधिकरण नई दिल्ली कोति ले आज पूरा देस म राष्ट्रीय लोक अदालत के आयोजन करे गीस। एमा छत्तीसगढ़ राज्य विधिक सेवा प्राधिकरण बिलासपुर कोति ले प्रदेस के सबो जिला अउ व्यवहार न्यायालय मन म घलो लोक अदालत लगाय गीस। एमा पारिवारिक मामला के संगेसंग राजस्व, चेक बाउंस, लेनदेन, बिजली बिल, पानी बिल, सफई कर अउ आने-आने मामला के राजीनामा ले निपटारा करे गीस।

शैक्षणिक संस्थान—अवकाश

राज्य शासन के स्कूल शिक्षा विभाग ह चालू शिक्षा सत्र बर राज्य के शैक्षणिक संस्थान मन म छुट्टी के सूची जारी कर देहे। आदेस अनुसार शैक्षणिक सत्र बर कुल चौसठ दिन के छुट्टी घोसित करे गेहे। दसहरा के मउका म सात ले बारह अक्टूबर तक छुट्टी रहई अउ देवारी बर अट्ठईस अक्टूबर ले दू नवंबर तक छुट्टी घोसित करे गेहे मतलब दूनो तिहार बर छै—छै दिन के छुट्टी रहई। उहें, जाड़ के महिना म दे जाने वाले शीतकालीन अवकास ह तेईस ले अट्ठईस दिसंबर तक रइही अउ गरमी के छुट्टी ह एक मई ले पंद्रा जून तक घोसित करे गेहे।

हल्बी / गोण्डी—समाचार बुलेटिन

सुनइया मन ल बतादन कि काली ईतवार के “हल्बी” अउ “गोण्डी” बोली म समाचार बुलेटिन प्रसारित करे जाही। ए दूनो बुलेटिन आकाशवाणी केंद्र, जगदलपुर ले प्रसारित होही। जेला बस्तर संभाग म ही सुने जा सकही। हल्बी म समाचार बुलेटिन बिहनिया साढ़े सात बजे ले अउ गोण्डी म समाचार बुलेटिन संझा साढ़े छै बजे ले प्रसारित करे जाही।

जिले की चिट्ठी

आकाशवाणी रईपुर के प्रादेशिक समाचार एकांश डहार ले प्रस्तुत कारीकरम “जिले की चिट्ठी” के प्रसारण काली संझा छै बजके 5 मिनट ले छै बजके 10 मिनट तक करे जाही। ए कारीकरम ल प्रदेश के जम्मा आकाशवाणी केंद्र मन ह एके संघरा रिले करही। ए बखत के अंक म “गौरेला-पेण्ड्रा-मरवाही” जिला के गतिविधि के बारे म जानकारी दे जाही।
